



*Minggu, 06 Agustus 2023*

**Ogen : Amos 4:4-13**



**Israel La Ngit Erlajar**



Lit anak gajah iiket ku bas sada batang kayu si galang. Iclubaken anak gajah enda kiam tapi la tersintakkenna kayu e. Piga-piga wari seh ku mingguna lalap ia rusaha guna kiam tapi lalap la ia ngasup. Piah dungna ia kem saja. Bage me wari ku wari, tande minggu, bulan ras tahunna. Anak gajah enda pe reh belinna. Ipindahken me ia ku sada iketen batang kayu si kitik. I je pe ia iiketken, lanai ia ngelawan, anak gajah e enggo melemuk. Idalanina geluhna i bas iketen batang kayu e. Situhuna, adi dagingna enggo galang mesunah kel nge niakapna ngerintakken batang kayu e, tapi erkiteken pengalamenna si ndube erbahanca lanai ia ngit ngelakokenca. Sada pelajaran si dat kita arah cerita e, e me: 'lanai nggit erlajar' erkiteken lit pemahamen maka "labo banci" entah pernah "gagal."

Nulih kita ku erbage-bage pengalamen geluh bangsa Israel; kelegon, pinakit man sinuan-sinuan, bage pe pinakit man kulana. Si enda kerina mabai segelah jera bas kerina dosa sinilakokena dingen ersembah alu mehamat man Dibata. Tapi bangsa enda mekeng dingen la ngit erlajar arah kai siibahan Dibata man bana. Seh maka kerina e ngerehken ukumen i bas Dibata nari. Oratna ngasup nge ia mereken persembahen pengataken bujur man Dibata alu mpersembahen simehuina. Tapi mulihi ku bas biak si la ngit erlajar erbahanca ia ngeluh bas keterikaten dosa.

Selaku nande tengah jabu, teptep wari kita iajuk guna erlajar. Melala dalam si banci jadi inganta erlajar. Pakekenlah kesempatan ras pengalamen e maba kiniulin bas geluhta. Ula sempat pengalamen si lit erbahanca kita "patah semangat." Kune pernah lit perbahanen salah entah gagal erlajar guna mpekenasa segelah enggo payo ras mehuli. Suankenlah bas dirinta e lit gegeh si mbelin guna ngubahken kegeluhen ku siterulin.

